

山木居士外集

上諸城劉相國書

伏以閣下之爲相也。於今十數年。天下之士望之若景星慶雲。擬其德業。比之於韓范富歐。仕驥側聞風義。懷傾向之私久矣。不意今年得列籍門牆。親炙休光。中心喜悅。榮幸何極。退伏念閣下負天下之望。天下瑰偉奇特之士。爲閣下所知。甄拔而出。利澤施於人名聲垂於時者。前後相屬。而仕驥以庸下濫附其閒。亦復奚足比數。然區區之心。亦有不欲自外者。竊譬之梗楠杞梓。並產輿區。而籐蔓牽引。亦不得謂非此土之所培植也。黃魯直上子瞻詩亦云。小草有遠志。氣味固相似矣。獨自愧言辭拙訥。進見之時。未能

親叩大賢調燮之宜。經世理物之要。而平日讀書考古。所謂扣盤

捫燭以求道者。亦未敢漫吐於君子之前也。拜辭以來。買舟南下。

值夏潦泛漲。徐徐而行。道途所經。覽地形之高下。相水流之緩急。

慨然想見疏鑿之功。古今之所以異宜。而沿河廬舍參差滅沒。老

弱採芻蕘。強壯備隄岸。奔走謁蹶。不遑休息。又未嘗不嘆守此土

○於○宰○相○只○只○如○此

○局○外○人○眼○地○方○情○形○

治此民者之難也。既歸里舍。益理舊業。未敢求息。蓋東廣微補。笙

屬○而○神○氣○一○片○貫○注○一○反○一○覆○正○見○上○文○所○言○乃○不○得○不○言○者

詩曰。循彼南陔。言采其蘭。眷戀庭闈。心不遑安。彼居之子。因或游

也○

盤。又曰。白華朱萼。被於幽薄。粲粲門子。如磨如錯。終晨三省。匪惰

其恪。仕驥老父年已八十。今幸得以未命之身。親進菽水。少盡子

職又念身爲大賢所知而或自棄玩愒時日是忘民生於三事之  
如一之義而身謗師門也此皆鄙褻所自勵者不自愧其無似輒  
瀆陳於鈞座之前以爲有懷而不自白亦非所以事君子也臨紙  
不勝惶恐

韓理堂日雅

上謝太常書

拜辭左右。邈爾兩月。自惟庸下。辱大君子十年之知。蹉跎潦倒。至此始獲一第。瀕行。復蒙諄諄慰誨。不啻家人骨肉之相語。仕驥何幸而克獲此也。卽日伏審履候。萬福遙望。燕臺不勝神往。仕驥於五月二十六日出都。附舟南下。時值糧艘北來。舟行未免延擱。至德州。夏潦泛漲。越臨清以南。益甚。沿河堤岸崩潰。決溢附堤居民。半在巨浸中。頽垣敗壁。莫蔽風雨。高粱已將成熟。水淹之後。腐爛焦枯。而河中流屍。累累載沉。載浮。尤令人傷心慘目。不忍見夫河之爲患於中國也。久其性迅急。時有意外衝決之虞。固不足怪。至

運河半由人力疏鑿先事而籌似可爲力仕驥愚妄竊以爲於秋冬水落糧艘已還之時挑濬河身以增堤岸堤益高河益深水至有所容而東省洩水之湖甚多日久未免淤塞益濬湖身取其芻茭藉以護堤夏雨時至得所歸宿亦可稍紓橫流之患腐儒迂謬事外臆測不知自愧素辱閣下以國士相期故卽途中所見妄陳情形以爲請益之地耳兩月在舟中飲食居處時凜鈞諭幸免寒暑之侵今已艤舟維揚將易舸溯行知屢念慮先此奉聞不勝瞻依之私。

韓理堂曰次事簡盡聲畫合宜

上裴大司空書

仲夏拜辭左右、買舟南還、至此又已半載、邇日伏審履候萬福、翹企之餘、彌深神往、仕驥不肖、局促鄉里、未嘗知世事、今年初遊京華、伏蒙閣下殷殷訓迪、勉以俟命之學、絕其徼倖之心、以此幸免疚悔、瀕行復蒙示以讀書之要、練習之方、到家徧告所知、皆嘆大君子愛惜人才、不忍其或有闕失、如此固古聖賢之用心也、況仕驥身受者、其爲感幸、宜何如耶、到家已來、收召精神、重理舊業、老父年已八十、朝夕在視、幸邀無恙、詩曰、夙興夜寐、無忝所生、仕驥自度迂疎、不適時用、惟是守其故轍、勉治先聖遺言、庶幾其或有

立以此報罔極之德而已閣下固素鑒其心者辱期望殷輒復陳  
其鄙趣諒亦其所樂聞也臨書不勝惶悚

司空與先生以古義相知故其所期非尋常所能測文懇款述  
情正古人對知己之言也

受業黃嵩齡識



上莊座主書

伏聞閣下奉

簡命視學中州。竊以中州古稱文獻之地。近日雖風流文物。或遜他邦。然自宋二程子倡道伊洛。而呂氏世傳正學。數百年不替。

國初夏峯先生教授蘇門山中。其高第弟子若睢州湯文正公一

○文○正○不○愧○此○語○

出而著大儒之效。况今

○此○非○可○以○迹○象○求○者○

教化日盛。庠序中豈無有聲光白闕學爲真儒者乎。伏惟閣下今

○字○字○湛○深○入○骨○

之人師。既司教育之任。必能剔隱搜幽。以大模範。鑄成羣品。俾出

而效

國家之用而斯世亦知儒術之果非迂疎也仕驥雖苦竅無適於  
用然辱在門下得見儒者之效之章施於世固出自大君子之所  
成就也不勝有榮幸焉因具布其區區之懷伏惟垂鑒不一

族父厚畬先生曰以古筆達古義醇懋之氣蔚然直入盛漢宗  
伯每語余謂絜非非功名富貴中人也其平日相賞如是宜乎  
絜非心爲之傾也

與彭允初書

客冬臺山在此。同兩寄手書。想俱入鑒矣。開歲倏又一月。伏惟侍奉萬福。清脩彌敦。可勝翹企。仕驥不肖。晝作夕休。蹉跎晚悵。惘惘昏昏。與道日遠。深惟七尺之軀。異於禽獸蟲魚。而半生誦法聖賢。出入如此。往嘗妄自期許。上之求如范文正。司馬溫公。以其學康濟。一時次亦願爲孔仲山。王彥方。以善化其鄉里。今行年已逾四十。而泯然無所表見。去歲與臺山劇談衷曲。不禁感慨係之。雖臺山曾有過爲獎許之語。並以聞諸左右。彼特樂與人爲善耳。而仕驥自反。隱微幽獨之際。其不克自持。而遷流於物者多矣。何能不

日切惶愧也。四兄先生治心有道，尙冀有以教我。是荷。因風具陳鄙懷，諸惟垂鑒。不一。

真意淋漓 受業雲識

寄彭允初書

七月中旬有人往蘇因作一書奉達後其人半途而反因遂留滯未發八月中旬有族人自蘇還甫相見卽縷述府上盛德自幸一市井商旌辱蒙老伯大人賜見又蒙四兄先生款款道故詳詢仕驥在家所爲及一切姍戚善行族人此回得見善人聞善言薰善氣其善心亦不覺躍躍然動矣旋出手示及頒到老伯大人文集謹盥手展讀讚歎不已老伯大人之文大篇小牘皆所謂仁義之人其言藹如者也而仕驥尤醉心於各碑版之文其所稱許皆信而可徵蓋仕驥往得讀翠庭先生之集內所載百年以來名公鉅

卿事跡及與一時善類往復書問皆可與老伯大人之文互相証發。而老伯大人尤善敘事。詳瞻有體。俾後之讀者。不啻見其人。其一言一行。皆可以爲法。四兄與臺山書。自謂不愧唐歸竊謂唐歸集中尙無此碑版文字。以其少此大題目也。鄙見擬以虞文靖公其庶幾焉。四兄以爲何如。大作靜山先生墓表。則震川嫡派也。居士傳訛字果多。其底稿臺山攜去。仕驥不知禪理。未敢擅改。今已一一如指改正。罔去人索書甚急。草草奉布。不莊不備。

論文處頌而不諛

受業雲謙

與汪愛廬書

客秋過蘇奉訪。以未得相見爲恨。與彭四兄居三日。備聞高風益  
中心思念不置也。幸大作在彼。乞歸細讀。竊見大兄先生於儒學  
之精。老佛之微。其中同異之分。邪正之界。皆能辨析無疑。條貫有  
序。而其辭氣之浩瀚迅激。若怒濤之來。不可遏抑。若江水之東注。  
滔滔無盡。又何其暢以達也。豈非所謂道弼於中。而文自襍于外  
者耶。仕驥不肖。才力驚弱。於諸儒之書。雖亦嘗寓讀焉。而自度粗  
疎。不能有得。僅取其一二切近者。聊以律身而已。至於精微之蘊。  
未遑及也。然每讀陽明子書。則胸中浩浩乎。若與曩者異。豈其性

之所好耶。無亦其真氣洋溢。有以感人於不知耶。大兄先生深於此者。還示之以爲何如也。舊文三本存。彭四兄處藉請教益。亦望別其得失焉。西莊先生還家否。前已有一書相覆。今未遑另書。其封公墓誌得閒。卽當爲之。晤時幸爲道及也。仕驥再拜。

婉而至 受業雲識



寄韓理堂書 附理堂來書

去歲自阜寧歸。投跡荒山。都與人事隔絕。暮春得足下手書。及大  
集讀之。喟然觀足下之所施於家。行於宗族者。卓然追逐乎古人。  
此實夢周所服膺。不獨以其文也。夢周固拙於爲文。今更居無何  
有之鄉。無所感發。益復屏絕紙筆。冥然而處。與時爲寢食。自謂便  
可過此一生。然幽昧之中。觸事興思。益覺斯人不可棄。利濟之念。  
怍怍未已。因思海內交遊。同此志者。旣多。伏而不遇。而夢周以旣  
退之身。無可復言。惟足下方需次民社之寄。依時而至。與  
○硬○接○硬○轉○七○十○餘○字○二○筆○勁○折○此○種○筆○力○亦○得○力○於○日○日○熟○者○也○  
天子共斯民者。惟良有司。此夢周尤願足下推其行于家者。以施

于國得時而爲務進之以古人之治一切反俗吏之所爲使世知古人之道必可行于今有志者皆相觀而起其爲關係良非淺細世之爲吏者不苦窳則浮沈浮沉者半在讀書之人非盡其才不可驅策彼固有所利之也曰無爲大惡爲大惡則刑至矣無爲大善爲大善則利去矣其究則未有不舍其小善而歸于大惡者何者所志在利利有涯乎爲小善則利有涯矣惡得不歸于大惡也其不罹于刑者倖耳夫國家課吏以廉祿止足以代耕乃爲吏者虛而往寔而歸比比皆然其所爲可知矣志行鄙劣如此又烏足以興古人之治哉然于此不能無少優劣者何也此以五十步笑

百步之說也。豈如不走之爲愈哉。未有利已而能利人者也。長此  
不已。斯人何賴。此夢周于足下。所以不勝拳拳也。夢周今年四十  
有七。筋力早衰。目尤昏眊。不復可用于世矣。功業不必已出朋友。  
爲之與自爲何異。歸于濟物而已。足下以爲何如。大集奉還。畧分  
甲乙。未審當否。臺山久無消息。尺木云近。居僧舍。息心學道。此書  
示之。並邀寄音。不旣。

前歲寄呈鄙作。伏蒙示以得失。並賜拳拳誨諭。獎勵交至。仕驥雖  
駑劣。敢不益自策勵。以庶幾無負良朋愛我之至意。荒村僻陋。地  
瘠民貧。而界連閩徼。風氣頑悍。易與爲非。仕驥心憂其敝。所以于

宗族之閒竭力勸有力者稍爲周卹庶幾衣食粗足漸可示以禮義俾與親睦之風以成淳厚之俗既而有姊婿陳君守詒亦以爲然其家稍有餘貲乃于附近鄉落勸其各立義倉而捐貲以成之陳君與仕驥同居一里里中戶口千有數百陳君復與其兄弟出家藏之穀三千石捐租田數百畝倡首建廣仁莊以稍濟斯土之人其創建規模經理格式陳君皆委仕驥爲之調度兩年來仕驥日與鄉鄰相接每入一村農夫田婦競來問訊老叟童孺環坐談諧仕驥於占晴課雨之餘娓娓爲之講明尊君親上之旨慈孝友恭之誼實之以天道福善禍淫目前報應不爽之已事聽者頗覺

忘倦言之似有小補往來周旋甚樂事也獨去年以寡兄弟之人而有姊之喪視疾半載卒罹此痛憂傷之餘衰頹甚矣老父年已八旬餘將來出處未可預定承策我云云固分內之事然得爲與不得爲亦似有數存其閒也廣仁莊曾求尺木作記不揣鄙拙僭爲書石假重尊名蓋藉二君以風示斯人也臺山兩年不得悉耗無從寄音其遁跡逃禪亦實有大不得已者也近于蔣太史心餘處得讀閩考功遺書不勝歎惋考功知我于十年之前而我今日始得讀其書如見其人愴然涕下其書四兄先生敘論允矣後世必有知之而好之者其家有印本乞爲致數部與我是禱因風奉

問近履。並陳鄙趣。伏冀更有以益我幸甚。

先生歲與韓公書問往復。每並讀之。藹然如春風和氣之襲人。真所謂同心之言也。此二書拳拳古義。觀彼此所陳。足以知二人之蘊矣。

受業雲識

寄羅臺山書

孟夏從貴宗人處寄一書後。倏又兩月餘矣。比審老伯大人福履康強。閭宅平善。爲慰。仕驥近趣如常。幸老父尙健飯耳。歲月晚晚。人事膠擾。此兩月閒。鬚髮忽變蒼白。治經一事。竟無從提起。稍有零碎餘閒。亦第泛觀零碎史策而已。未知二哥治周官所得何如。羨慕之私。真不能以已也。敝村今歲頗覺祥和。癘疫不作。早稻豐登。惟附近僻村。夏季稍有噤口痢症。往往三五日內。卽能死人。仕驥參酌古方。製清平丸。一方治之。頗獲奇效。未知貴鄉風景何如。其清平丸方。附寄請正。又因祖墳被本族子孫盜葬。事發押遷。著

風水解惑一篇衆謂有裨于人心風俗。做門輩因磨石請書付鐫。楊以贈人敬呈十本。迂腐之言。二哥閱之以爲何如也。仕驥因春閒稽查保甲得族閒戶口之詳。見其窮苦之狀殊難爲懷。因太息謂廟中若能積穀千石。做社倉之例。豐年則出借本族力農之家。荒歲則減價平糶。亦小有濟。而族人聞之皆以爲然。今已捐至六百餘石矣。雖不足姑爲之先。以俟繼起者。而族中因此亦遂頗覺聯絡。或有雀角鼠牙。一經勸解。便能消釋。不至牽連成訟。此可見天良不昧。三代直道。原存于斯民之心。患在士大夫以勢相加。遂覺有富貴貧賤之殊。愚民乃忍於爲非耳。允初近得書來云。春閒



寄二書其一則沉浮未接矣內寄二哥一書又愛壚公復各一書  
公復允初文各一篇因七月中旬有人往蘇特竭力送上以候回  
音伯母大人吉壤已就否公復之言深可念也粵行何時家計亦  
宜早自區畫善策無致如仕驥身負重累心爲束縛不能擺脫也  
愷齊近在山館去未及索其書其內力不知何如其外事一切甚  
堅定也兒子學徒輩並各有書請安二哥覽之便知其近功矣緣  
善錄五部醫門普度五部俞公遇竈神記廿帙附上諸惟努力自  
愛縷縷不一仕驥頓首

真切

受業雲識

與同年楊叔山書

客秋因進賢龔君附書奉問。眷蒙手書還答。並寄示兩世家珍。啓玩之下。焜耀輝煌。真令人肅然起敬也。承命跋尊甫遺墨。又永索拙作散體雜文。詞旨所及。獎許逾量。愧不敢當。仕驥庸下。僻處陋鄉。自度迂疎。本不足爲世用。故亦不敢汲汲於仕進。蕭然一室。嘯歌古人。時妄有所論。撰聊以自娛而已。而不自知愧。紙墨浪傳。過蒙老成前輩。閱其志而獎借之。其實胸中。枵然無有也。自忝辱同舉以來。濫竊非據。身累益多。荒落尤甚。邇來並不敢言文矣。顧辱嘉命。勉綴鄙辭。大懼無以稱遺翰而塞仁人孝子之心也。謹莊書。

一通附舊作三帙同往。惟垂教焉。抑昌黎韓子自述其爲文之意。以爲學古道。則欲兼通其辭。通其辭者。本志乎古道者也。凡仕驥之有所論撰。亦竊有志於此焉。而愧未能也。足下家學淵源。今年少成進士。此正力行古道之時。又體弱。日以仁義道德養其心。俾心安而體亦旺。他日出而爲循吏。爲名臣。以繼家聲於弗替。是仕驥區區相愛之私。所不盡禱祝者也。伏惟俯鑒愚誠。努力自愛。臨書翹企。

諄諄懇懇如骨肉手足之相語。先生性情之厚具見於此矣。

業受

景濂識

與同年彭斗占書

蔡君乳泉過舍辱手書且詢悉足下志趣之高學問之勤忻然嚮慕旋復惶然抱愧甚矣仕驥鄉者知足下之淺也蓋仕驥生居僻陋自度庸鄙不足以爲世用所以閉戶窮山中未嘗敢與當世賢士大夫相聞獨甫冠時過蒙羅君臺山以志行相取引爲同心顧仕驥年日加長而德不加修術業無所表見反躬自考彌用赧然羅君豪傑士胸襟甚大交遊甚廣其有所之不忘親故輒復以鄙人姓名齒於同儕中是以以無所短長之身而謬獲虛譽如來書云云也足下潛心聖籍篤志不怠可謂闡修之士春秋兩闡仕驥

幸辱同舉。每於卒卒爲會之時。憶足下甚有意乎仕。驥而仕。驥習  
昧。竟未能知足下之所處。若何其爲庸鄙不愈可知耶。顧蒙足下  
不以爲罪。而棄絕之。書來勤勤懇懇。獎借逾量。蓋君子與人爲善  
之量至闊極大。故其待人之恕有如此也。然所以重仕驥之愧者。  
滋甚矣。同舉諸君。若歷城周君。餘姚邵君。固才高而學博。卓乎名  
實相稱者也。而同鄉中若董君邁。三楊君枝山。皆志氣偉然。不囿  
於俗仕驥。皆於歸來始先後知之。然以足下之爲人。推之則夫抱  
友俱深。遠志篤實學而聲華闇。汝不事表暴者。豈少也哉。恨無由盡知之。  
耳。承索鄙文。愧無足以自信者。今往與諸同年來往書序數篇。亦

足以見仕驥之疎慢而負疚於心類如此也帥君松田羅君效寅久切馳想諸同年相晤並祈致意

先生友誼之篤中極熱而外極冷非久與之處莫能知也又痛懲浮夸標榜之習恐躬自蹈之故其交友惟以古義相取而既已定交卽久而固結不解讀其文幽光閎抑而深情時露於語言之外亦可得其槩矣

受業景淳識

答汪龍莊書

春正奉到手書及邵太史二雲書。比三月杪。又於黃君補畚處接奉手書。承過聽臺山二雲之言。謂仕驥粗知文辭。俾之爲闡揚堂上盛節之文。伏讀令先君兩太孺人事狀。載繹來書。仁孝之思。懇懇惻惻。令人感動。而不能以自已。惜乎仕驥文筆劣弱。不足以稱二君相推之意。而有當於仁人孝子之心也。謹就思慮所及。勉綴世德傳一篇。冀垂教焉。抑來書謂以臺山之言。求得朱梅崖彭尺木李潮陽之文。梅崖仕驥之師也。尺木之文。亦迄今所罕。潮陽論著仕驥雖未得見。然大抵臺山之言。非溢美也。而山東濰縣有韓

理堂夢周者其文淵懿醇茂卓乎可與古之立言者並仕驥亦因臺山而得以書問往還與爲神交臺山何以未爲足下言耶又桐城姚姬傳郎中文辭高簡深古仕驥曾見其一二作不勝傾服竊謂其必可信今而傳後者以足下孝忠誠壹博求文字以傳其親並以附聞然足下學古道而通其辭事狀之作已自足不朽其親矣而深心博采擇人而交則仕驥所稱二君子者當必已得其文也抑中有所見不能不盡耳臨書惶悚

文氣亦清古 受業雲識



答徐心一書

令弟至承手書。以令祖行狀相屬。令祖盛德。固仕驥所中心佩服者也。前日聞其卽世。早擬作一文以紀其實矣。今承見委。誼何敢辭。顧恐文筆劣弱。不足以傳休美。有負孝子慈孫殷殷之意也。如之何。大作行述。纖悉不遺。固子孫紀先人之體。承下問。僭爲增損一二。以其中有可以示諸人人而亦不必示諸人人者。明者當心知其故也。令弟行速。先此報聞。行狀容齋一思慮爲之以獻。諸惟節哀順變。以當大事。不一。

語約而意盡

受業黃得恒識

答徐虞尊書

春正於梅崖先生所得見足下。極欽德器不凡。雖會晤僅止兩日。而別然憶其風度。未嘗不往來於懷也。愚菴書來。亟稱足下不已。且述謙虛下問雅意。今一旦蒙先之以書。贊以所業。古今文將之以金幣。此豈鄙劣所敢當耶。顧愚菴極道足下誠意。俾之勿辭。則又不得不強顏受之也。雖然梅崖先生仕驥之師也。仕驥之所以爲文。受之於梅崖先生者也。今足下勤勤懇懇下問於仕驥者。豈非以仕驥稍知爲文之道耶。顧仕驥於梅崖先生之所以爲文。僅窺見其一二。又惡能冒昧爲足下言之。且足下與梅崖先生生同

邑里重之以嫺戚。梅崖先生之論文。足下亦既聞而耳熟之矣。仕  
○長○句○勁○健○如○屈○鐵○。驥即欲舉梅崖先生之所以語仕驥者。以語足下。又豈有加於足  
下平日之所聞哉。顧厚意不可以虛辱。無已。還即所聞於梅崖先  
生者。爲足下陳之。蓋梅崖先生之爲文。昌黎韓子之家法也。韓子  
之蘊。先生亦既無不發之。以示學者矣。而揭其要。尤在答尉遲生  
一書。其所謂君子慎其實。實之美惡發焉。不掩者。未嘗不反覆稱  
之也。仕驥於梅崖先生之論。無不默而識焉。而於斯言。尤日三復  
之。不置也。伏以足下爲賢達之子孫。其家學之淵源。既不同於尋  
常。又以嫺戚故。親沐大賢之澤。漸漬薰蒸。其淪浹於肌髓。充溢於

心胸者實之美也。固所謂有諸其中者已。而鄙劣如仕驥。亦承下  
問垂及其受善之懷。又豈不若谷之虛耶。仕驥自愧無狀。不足相  
益。申以師說。亦所以答勤勤懇懇之意云爾。大作率鄙見論之。當  
否更祈教我。何日把晤。相與劇談。企切不盡。

金芭汀曰。荀卿子以學不稱師教。不稱師謂之畔。與倍絜非於  
文。篤信梅崖先生而不惑其所稱說。未嘗或離由其識之正。亦  
其性情之專一也。此文往復自道。亦極似梅崖先生。

答陳繹堂書

辱承手書示以謹慎文字俾勿爲人作詩文集序者。非愛我之至。安得聞此言。不獨感激靡已。亦當銘勒於中而不忘者也。仕驥迂拘鄙拙。足跡未嘗及遠。交遊不出里巷。雖以庚寅恭逢

恩科幸獲鄉舉。明年辛卯會試成進士。願引

見歸部銓選後。以老親年高。遽歸子舍。自始至京師及歸里中。閒僅三閱月。卽同譜諸君子。匆匆公所一會。未遑私謁談讌。歸來六七年。益閉戶株守。屈指生平知交。不過數人。大抵以朴訥質實相勗。勉未嘗敢有夸詡聲氣。標榜名譽之心。故雖嘗謬習爲古文辭。

而序記之體絕少。荒村寂寞。名流無由而至。近日新著作。未嘗一得寓目。自無緣爲之序論也。而硜硜之性。自始習爲古文辭。於古人之書。獨好觀歐陽文忠曾文定二集。而尤心慕夫文定公。以爲文章爾雅。訓辭深厚。蓋詩書之遺也。繼之則樂觀虞文靖公學古錄。楊文貞公東里集。歸大僕震川集。其他雖柳子厚王荊公蘇氏三父子之文。每一展觀。輒覺其峭岬鑱刻。不樂於心。至於明中晚以後諸名家文字。偶一寓目。中心卽有所梗。因遂廢棄不觀。蓋亦性之所近。不能強也。故雖嘗好購集古書。而自明中晚以後書。竟無有焉。近年來念區區此身。雖迂拘鄙拙。不適於用。業已仰蒙

天恩。

賜以出身。行當出而作吏。日思所以克共厥職。報効。

國家者。伏讀。

欽定大清會典律例諸書及成案條例各集。仰見我。

朝深仁厚澤。垂爲。

憲典。所以承天之道。以治人之情者。精詳周密。朝夕體玩。雖有他書。未遑及焉。其或因鄉里親朋之求。作應酬文字。亦稽經誼。律務求不倍。

聖化。此仕驥近日讀書作文之大較也。凡此皆執事素所稔知所。

以縷述者。以愛我深切。久不相見。用以慰相念之深衷耳。雖然。仕  
驥僻處荒村。寡所聞見。深懼過愆日積。尙望時賜德音。教我不逮。  
是所幸也。諸惟自愛。不一。

真實樸摯。絕無一毫裝飾。

受業雲識



與李愚菴書

前小力回承示具稔一切今歲

恩科吾兄雖尙在制中不能與然轉瞬來秋正科在即竊願和平其心專力揣摩科舉正業以圖一出而爲

朝廷用幸甚幸甚凡人功名富貴自有分定蓋冥冥中之所以位置斯人必非偶然厄之於早者安知不得之於晚厄之於其身者安知不得之於其子孫張子所謂厚吾之生玉汝於成均屬造物之愛我吾惟盡其當然行所無事以承造物之愛而已慎毋憂愁幽思自嗟不遇也吾兄曠覽遠識胸次浩然豈尙見不到此所

以云云者以兄賢而久困親厚者或慮其偶不自持耳要亦所謂以小人之心度君子之心者也抑有請者兄好古愛博旁搜遠討細大不遺雖古書之正偽兄固已昭昭然別若黑白然以好善無厭之心或偶有一字句之佳者輒復不忍廢棄近者皇上開四庫館訂定羣籍凡言之不合乎道者黜而去之

聖諭煌煌

頒示天下者屢矣蓋

望人仁愛儒生欲盡內之於中正之途誠恐詖淫邪遁之說流傳浸潤而深山窮谷有志之士或以眇見寡聞爲邪說所中至自陷

於匪僻斯誠防於未然其所以爲世道人心計者至深遠也仕驥  
竊以古聖賢之籍至我

朝而大集其成自羣經史鑑下逮漢唐宋元明儒先之書與夫古  
文詩賦制義

列聖相承

膏鑑淵深悉已

御纂精粹

頒行天下俾多士得以購求誦讀學者誠能寢食其中探討服習  
其所以經方致遠希賢希聖者胥在是矣固無俟他求也而書集

之駁襍至明之中晚爲甚蓋其時人心不正事雜言尤好名之徒  
家自爲說人自爲書爭著述以欺天下後世其流傳於世者甚廣  
其流毒於人心者無窮仕驥竊謂古人文集卽至明宜以嘉靖之  
世爲斷自此以後無論詩集文集聚宜屏棄勿存蓋爲下不倍卽  
草野之所以尊

君也吾兄學有經法通知時事諒不以斯言爲迂矣其友朋相聚  
教誨後生子弟尙兢兢以此相告語共歸仰於  
文治之光華焉契闊久不得相晤因風佈懷縷縷不一

溫厚和平之氣襲人 受業雲識

與黃穆修書

前小方回承回示具稔一切約堂旋寄一書謹附上三令兄歸卽  
日仍往諒可買舟同行也吾輩叨先人德澤之遺幸邀一第所謂  
餘慶者已於我身見之矣此後廢續前美俾長福後人又在吾輩  
自爲之百里之幸數十萬生靈託焉一受其任作善惟此作不善  
亦惟此吾輩讀聖賢書畧識數字諒無甘心而作不善之理惟是  
身家念重未免習俗漸移甚而愛惡情偏因之喜怒由我蓋衣服  
車馬之閒燕遊徵逐之舉稍不自持旣以耗財者敗檢卽以損德  
者折福尤可懼者折獄聽訟呼吸之閒動關人之生死躁率者固

失之輕浮而遲疑者又失之留滯稍一不當二者其失維均而留  
獄之滋事彌甚往往有身爲廉吏而其後嗣未必蒙福者恐其閒  
正不能無失誤焉天之報施斷斷不爽吁可畏也偶閱說家言有  
數疑獄足以啓人神智暇中爰錄出時資省覽因良友啓行附上  
舟車之閒用消暇日未必無小補也承愛我心切諄屬節勞弟非  
不知偷嬾顧亦自惟薄德幸有今日皆先世之遺而人生壽命未  
可知出處難預定計惟隨時隨地有小可益人之事勉力自效聊  
消宿孽庶或子孫不至餓殍而已五兄知我最深故不惜傾肝腸  
以告也長途幸自保愛縹緲不一

真切

答黃穆修書

高軒入都後三接手書甚慰一切初聞掣選黃梅深爲之慮及知  
榮調垣曲乃爲大快此地地僻民淳正可以施臥治之化承諭極  
力節費固爲儉以養廉之道抑尤須精勤振作凡事親理則用人  
○目○之○細○事○必○親○意○正○如○此○但○須○執○勤○數○刻○無○苟○倖○耳○  
可簡而防護可周署中辛倖食用亦不期節而自節矣則勤尤儉  
之要也吾輩荷先人庇廕幸叨甲科一行作吏縱不能如古循吏  
德施千世聲流萬祀而祖傳讀書種子不可自我而斷子孫餓莩  
之根不可自我而種福善禍淫斷斷不爽不可不慎也世俗以仕  
宦爲子孫立業竭力厚積錙銖必計然往往不旋踵而傾覆無餘

以吾兩人耳目所及如此類者何可勝數然則其所以爲子孫立  
業者正所以爲子孫作孽也吾輩爲子孫計宜知所去從矣今日  
時勢凡事之有利於民者靡不興舉而弊之或累民者除之宜亟  
不獨此也亦所以善自全也  
然須潛移默革無以已之所能病人如社義倉本以利民而在今  
日反以累民官查吏索不勝其擾所以民甚不樂有此舉也垣曲  
接連豫境頗稱殷實未知畜積何如如欲爲備豫之計惟隨時隨  
地勸民自相周卹或世家巨族積於家廟或村落之中互爲預籌  
總不以關聞於官此事須至誠惻怛爲之講明其理不獨安貧實  
所以保富也編查保甲今日要務果能實心辦理即可親履鄉村



曲爲勸導而於宣講

聖諭之時。諄切教民。以睦姻任卹之誼。此皆吾力所得爲者也。垣曲文風。山右稱盛。因而益鼓舞之。此兄所素裕。無俟外求者矣。大抵吾輩居官。凡事惟求實在。有濟於民。無爲近名。無求速遷。庶稍可以無疚於心矣。乎以兄之明弟。皆可以相信。所切期者。勤耳。勉之。無怠。縷縷不一。

黃補畬曰。穆修爲人。沉靜醇謹。然質近仁柔。而剛決其所不足。絜非以勤字勉之。可謂根本之論。蓋勤則練習於事者。日熟而可致其決矣。合前書並讀。諄諄懇懇。可謂忠告而善道之者矣。

答黃補翁書

令姪海嶠客冬南還。攜手書相示。比又辱元日書。故人千里。拳拳如此。真可感也。仕驥數年來。守拙荒山。自度於世未必可用。而妄竊科名。虛靡歲月。毫無報效。是負

朝廷取士之意。而平日所以自期與良朋之所以期我者。亦付諸空談也。所以不揣分量。於宗族鄉黨之間。遇小有裨益之事。輒以身任之。而不疑竊以敦宗睦族之事。莫如義田。睦婣任卹之舉。肇始積穀。敝族貧困已甚。人罔相顧。仕驥舌敝唇焦。勸稍有力者量出其餘。爲義田。張本。今已稍有端緒。而鄉里之間。向年凝齋陳先

生家藏積穀三千石以備凶荒。今其諸嗣推而出之。俾圖久遠。仕  
驥於是。因而勸捐得白金千餘兩。創建倉廩。名曰廣仁莊。而陳君  
兄弟更捐租數百畝以衛此穀。又凡附近村落之貧瘡者。亦勸其  
各立一公倉。其穀則皆陳君約堂任之。約費穀五六千石。而創建  
之初。約稽出入一切義例。皆仕驥爲之調度。是以邇來僕僕奔走。  
日不暇給。筆墨荒蕪甚矣。承二兄先生關注勤勤。屢以問訊。故不  
惜縷述之也。承示綢州俗悍吏驕。土荒風靡。以二兄弦歌雅化。化  
之。諒可日臻上理。惟是山谷之民多逐末利。每以腴田而種藥草。  
倘遇饑饉。恐難自支。此須預籌之於未然。每行鄉落。輒召紳耆。勸

其早爲畜積自相周卹或鉅族著姓積於宗祠或大村聚處貯一  
公所平時有備則臨事可以無虞要須至誠惻怛以感動之俾其  
自爲畜積自爲經理而不以官與其閒則民樂從矣蓋今日社義  
倉受官吏之擾實甚也我雖不擾而難保官親胥吏之不擾我雖  
能禁官親胥吏之並不擾而後來官吏之擾且無已時所以不可  
以官與其閒也至於荒地勸其多種雜糧則遇歲饑亦可小小補  
苴二兄以爲何如海嶠攜令郎來學敝里仕驥不時過從正可相  
與考論其學業也諸惟努力自愛不盡

字字切要所謂仁人之言論事樸直明健韓歐之家法也

受業黃得

恒  
識

答黃筠莊書

作前書竟覆閱之殊草草未盡所懷今更引而伸之蓋范文正公之言曰吾宗族甚衆於吾固有親疏然自祖宗視之則均是子孫固無親疏也吾安得不卹其饑寒哉且自祖宗來積德百餘年而發於吾若獨享富貴而不卹宗族異日何以見祖宗於地下且何以入家廟乎愚嘗由此言釋之天地以生物爲心以愛人爲德然說理如此微妙蕭由靜悟得之而筆復奇健故無一毫腐氣元氣之流行於宇宙者亘古亘今無或損益此盛則彼衰彼羸則此縮其理然也古者有大宗有小宗相維相繫其說以本支爲言蓋取象於木也今夫木之生也方寸耳由此而積小高大千枝萬

條紛糾交錯然獨一枝繁盛則其餘皆蕭疎細微夫天之雨露非不均也地中之澤無所偏也然旣一枝獨繁而盛則天之雨露爲彼所獨沾矣地中之澤爲彼所獨擅矣故夫一族而有一大富貴之人則其餘類多貧賤饑寒不能自振此非富貴之人累之而實富貴之人累之也故富貴而不卹宗族微特無以見祖宗卽天心必且弗享將移而之他矣何也元氣之流行彼盛則此衰此羸則彼縮蓋天地生物之心愛人之德於不均中寓至均之道也此乘除折算之妙也嗚呼樂郤降爲皁隸社稷之子或在猷猷千古同慨然自明者觀之固知其必然矣今太史一門之盛祖孫父子相

繼相續然而五服之內無人焉。是自高曾已來其福澤皆萃於太史一門也。太史得不念天地祖宗之心而爲之計哉。餒而之鬼當立後以撫之。無以資生當分產以贍之。由高曾已上量力置義田以卹之。吾見太史之盛。當日加而未有艾已。安溪李文貞公曰。以父母之心爲心。天下無不友之兄弟。以祖宗之心爲心。天下無不睦之宗族。以天地之心爲心。天下無不愛之民物。孟子曰。親親而仁民。仁民而愛物。嗚呼。此禹稷思天下饑溺皆由已而伊尹恥匹夫匹婦有一不與被堯舜之澤者也。吾願太史擴其志量更加意於斯焉。



壽齡達先生數年以書請益先生書來相覆如此壽齡敬懸之  
座右時切觀省而見者無不驚歎謂其議論之奇縱由於識見  
之廣大細思之皆切要之言也壽齡惟日三復之庶幾無負師

訓云爾

受業黃壽齡識

答黃筠莊書

春間一書奉問。想已入鑒。入夏來三接手書。荷蒙垂愛。拳拳獎許。過分慚感。曷勝。仕驥不材。幸邀一第。閒居林壑。自惟人生之年。命未可期。則將來之出處。未可必顧。濫竊非據。而毫無涓埃之報。是負

聖天子臨軒策士之意也。蓋益之初。曰利用爲大作。元吉无咎。其傳曰元吉无咎。下不厚事也。仕驥深懼無以處此。益是以數年來。於鄉黨宗族之間。目擊窮簷困苦憔悴之狀。竭口舌之力。筋骨之勞。勸稍有力者。相與出其餘爲。

聖朝養此窮民以

堯舜在上固不忍斯世有一夫不得其所也以區區耳目聞見之所及稍盡其心是亦所以爲報云爾顧以性本迂拙素無應事之才勉強效用徒形竭蹶是以數年來親詩書之時甚少而筆墨荒蕪甚矣承索近作自前年收拾稿本奉寄後存者寥寥卽有一二率率酬應要亦無關體要也暇日頗思蒐輯古今名臣備荒救荒之法暨

大清會典中冠昏喪祭之制切於民生日用者合成一書爲牧民要典以食時用禮養與教二者固相須而成也顧亦以忙冗尙未

及爲將來倘克成稿。當寄正耳。示及近日討論元明列傳。此不朽之業也。鄙意兩朝中名人文集。若虞文靖、楊文貞、唐荊川、王遵岩、歸震川。彼其著錄。皆稟史法。似亦可參互而得是非得失之準。太史以爲何如。侍奉萬福。闡邸綏慶。令兄想已在途。舍閒一切。屢蒙厯念。老父幸健飯。豚兒庸鶩。殊無善狀。可爲知己言者。差不刻薄耳。因風具溯。所以執筆。覩縷不盡。

窮經所以致用。爲學務在力行。先生平日之所以自勵與其所以教人。皆不越乎此。請此文懇懇。款款所言。皆其所行也。文氣深醇。樸茂。直入南豐之室。受業饒慶萱識。

寄厚翁先生書

相違又二年、伏想治績益懋、弛張益熟、大河南北、循良之聲、洋溢  
遠近、此蒼生之福、亦宗族之光也。仕驥養拙家中、毫無進益、幸老  
親尚健飯耳、吾家家運日替、非獨無財、卽人丁亦漸稀少。自仲正  
公以下、男婦合計、不過五百餘人耳、而後生子、弟人懷異心、各不  
相顧、夫祥和則日盛、而乖戾則日衰、固理之常也。萃人心之渙、莫  
如宗廟、仲正公之廟、豈容已乎。先生既有意貯金以待事、凡屬一  
家、聞之莫不歡欣戴頌、繼以感泣。此亦人心之公理也。而三數老  
成、謂必待資足而後舉事、恐繼起者、尙須時日。今祠址旣具、而先

生業有貯金。不如因而先構寢堂數椽。以爲棲神之所。俾仲正公得時饗。烝嘗而子孫亦有所統攝。不至落落漠漠。視如途人。俟繼起資足。再擴大其門庭規模可也。此誠慮事周密之言也。其貯金乞如數早寄。以慰衆人顙望。是禱。諸惟珍玉不盡。

涂詡菴先生曰仁孝之思藹然惻然

寄潤堂族父書

前月杪到接手札具悉一切甚慰吾輩讀書幸邀一第出宰百里地無論美惡但盡吾職分所當爲求不愧此心而已至於公私之或有濟天也然人定者亦能勝天安見循分自盡者之遂不如高才捷足者乎此固叔父大人平日自信有素者也但凡百調度倍費經營耳叔祖母大人康健逾常闔第悉安吉仕驥株守錄錄毫無善狀幸老父亦尙健飯爲慰春夏之閒連寄尺書又於忻州叔處附書集二種想俱入覽矣族中義穀規模粗就將於家廟之西建倉族人固有此舉稍覺興親睦之風積漸之久應可成禮讓之

俗此可見人心易感其忍於爲非者實由飢寒所迫而吾輩又無力撫卹而教導之彼自視乃覺有富貴貧賤之殊而甘於自外耳今族中景象如此尙堪維持也獨我親支衰弱日甚何以振之叔父此時固力不及此幸而及此則一家之福也惟時切禱祝而已諸惟努力自愛不盡

文情悱惻字字從肺腑中流出近來族中得先生維持頗覺貧富不甚相耀而於先生尤愛慕敬信人心易感固不誣也

受業景濂

識



寄忻州叔書

客鵬接手示。極見心切古道。而又謙虛若谷。真令人欽服不已也。辱關注鄙拙。期許逾量。殊深慚赧。仕驥無狀。株守里門。深懼不能自立。爲宗族羞。而近年來蒙族中諸老成過愛。凡有公事。悉以相委。卽或彼此嫌猜。一爲勸釋。卽皆歡然無閒。此時族中人心頗覺協和。此皆祖宗積累深厚之遺也。府中人人恭謹。頗有萬石君家風。尊卑長幼。遇事互爲調劑。仕驥嘗竊歎世德如此深厚。其遐福正未有艾也。今川運例開。昨接考功弟信。爲仕驥審所處。謂宜從中書出身。承族中伯叔兄弟。亦以爲然。且謂家雖貧乏。而戚族有

力者皆肯效將伯之助。然仕驥自度迂庸。本不足爲世用。而戚族相愛。以其有用之財。費於仕驥無用之身。不如廣諸人人。廣諸人人。不如專以濟困窮。亦足相天地好生之德。叔父以爲何如。家廟義倉。粗就仕驥初意。不欲以此末節相聒。而望專力置義田。以贍族。故前信未嘗及此。今計之。卽此亦不得不仰望仁人。甚矣吾族之窮也。伏望示以救急權宜。是所切禱。外義倉規條附闕。執筆縷縷。不覺累幅。惟俯鑒焉。

不私其身而閭人之困窮。此先生生平之心也。請如之言讀之。

感人無已 受業中憲識

寄忻州叔書

頃蒙手札反覆重深於家鄉一切事緒無不注及仰見一家休戚相關至意感何可言兼承尊者厚賜雖義不敢却而增愧彌深耳義穀承酌增二百今歲族中亦尙有增輸者或可廣至千石也一家叔伯兄弟比日多蒙周卹不獨身受者生感卽聞者無不歌頌大德范文正公高風復見於今矣惟是族中衰弱不振已甚辟之魚退處於陸相煦以沫相濡以濕其何能支惟大決西江之水庶幾轉運有地耳願抱豪傑胸襟具遠大之志識如老叔大人者身爲廉吏家尙無中人之產何敢以此相告然微老叔大人又孰足

語此也。仕驥竊惟孟子有言：人人親其親，長其長，而天下平。收合宗族，今日惟有義田一舉耳。顧一族之衆，非二三千畝不足以濟。天下事緣以有特而鮮功必待有此大力，始克舉行。則凡族中顛連無告之人，索之於枯魚之肆矣。鄙意望節齋廉俸於切近本支，量置義田，其別支有力者，或亦聞風而慕，是亦所謂各親其親，各長其長乎？亦所謂老吾老以及人之老，幼吾幼以及人之幼乎？至於宗祠之中，稍爲之倡，或亦有慕義而繼起者乎？承諭明歲俾長弟歸家讀書，此自仕驥之責，其何能辭？其他諸事，凡仕驥力所能爲者，皆義所當爲者也。無煩遠念矣。諸惟珍重，自愛。臨紙，顰纒不盡。

韓子之原人曰聖人一視而同仁篤近而舉遠先生念念不忘  
斯義形諸語言文字者匪一而足然非其人莫能喻也忻州蔡  
傑胸懷本與先生相契於微此書所言遂一一次第見諸施行  
可謂兩美相成者矣

受業景濂識

寄考功弟書

新歲伏惟侍奉多福。闔宅集慶。可勝企祝。舍閒叨庇。亦平善。老父眠食如常。獨仕驥錄錄無狀。徒增髮種種耳。歲前後兩接手書。示以川運例開。俾由中翰一途出身。具感相愛至意。但仕驥自思老親年高。固非可出之時。蕭然一室。亦無可捐之具。借助於戚友。將來何以爲報。審於斯三者。不得不退然自沮也。又念此時吾家業已有人出仕京外。繼此英俊。日起尙當有人居家維持之人。亦不可少。仕驥雖不肖。竊願勉力從事於此。至於他年或出或處。未敢預定。然百里之宰。雖曰俗吏。而

天子所命戶口之息耗風俗之淳漓繫焉農桑學校苟能盡心未嘗不可報。

君恩於萬一以仕驥自揣迂拙之性雖不合時用猶願一嘗試焉。賢弟以爲何如家廟義倉一舉亦不得已而爲是補苴之計耳敦本睦族此外正大有事在非有大力而肯任事者未易言也承詢問聊一及之縷縷不一。

審於自處亦復善於立言先生嘗舉韓子愈之退未始不爲進之言以示學者以謂士必如此而後可自立讀此可以知其所

蘊矣 受業景淳識

寄考功弟書

正月一書想久入覽。即日伏惟侍奉萬福。闔室綏和。企企慰慰。仕  
驥近狀如常。老父亦荷平善。義倉規矩已勒碑。並刻底冊。稿本附  
閱。但此亦祇治標之術耳。其本必得義田爲主。以此相輔而行。則  
庶幾久而益善也。鄙意總期合族多溫飽之家。貧富不耀。有無相  
通。人皆和睦。室無勃谿。族其或者復振。不然吾懼其日卽於頽靡  
也。有信達忻州。祈常以此事語之。此非行事有豪傑規模者未足  
與語也。因便附此奉候。諸惟珍愛。

仁義之人其言藹如也

受業景濂識



寄考功弟書

昨寄義倉底冊稿本奉閱頃刻本印刷已就更寄四本此舉本爲  
備荒起見而豐年農家亦得藉以轉運稍寓補助之意但恐覲覲  
傾借者衆故其立說以廣祖黜爲名然族人聞之甚樂雖貧者亦  
勉輸石斗於此見族人尙知敦本而可與爲善也初勸捐時亦有  
有力者別生議論以爲凡事靡不有初鮮克有終積漸久之此事  
徒飽經營谿壑如向日社倉之例齊民不得過而問焉因此疑沮  
者亦頗有之仕驥竊謂此皆吾輩之過也凡舉公事必使衆人共  
知之宗族鄉黨之間尤宜和衷共濟不以富貴相加乃足令人彼

此相信爰於收穀既齊勒石於廟又卽石本另刻木版印刷凡輸穀與錢者人送一本蓋俾捐輸者人人皆知所出不爲虛妄而義例衆著亦可稍息覬覦之心卽經營者欲於中侵蝕而合族皆知額數人人得而稽查之勢亦有所不能又於紀名中以穀石之多寡定名次之前後令人一目而知孰爲有力而推諉不前孰爲無力而勉強從事此中亦微寓激勸之意於是族人聞之益大悅雖疑沮者亦頗悔但得今歲豐登如前則重捐者有人新捐者亦有人惜乎其有力者之少也仕驥又以吾鄉習俗奢靡近日富貴之家每值壽誕則釀金製錦稱觴賓客滿堂宴飲無度所費不貲而

於族人之貧窶者益闕絕。幾於不相往來。乃與同族約。凡年六十以上者。乃得爲壽。而爲壽之禮。以簡樸爲貴。雖富者不必豐。而貧者亦可與期于盡其意而已。主人亦不必開譙。卽有力者。恐人議薄待其親。則移譙飲之。費輸穀義倉。以惠族人。今已行之。一。二。家人亦咸稱便矣。賢弟有信。往忻州右玉。亦祈以此刻本底。冊寄之。纓纓奉布。諸惟努力。自愛。不備。

韓理堂曰。讀諸家書。賢者之設施。見於宗族者。既有成效矣。異日爲邦伯。落落布天下。爲萬物吐氣。不在斯人與。

與友人論保甲書

辱承下問。俾陳所以行保甲者。足下學古入官。甫將入仕。卽殷殷然實心講求斯事。期不負

聖天子慎重民牧。委任責成之至意。誠古君子敬事後食之心。能審於治理之要者也。保甲良法。弭盜安良。

功令煌煌。責成州縣。實力遵行。果能行之久而無斁。豈惟弭盜安良而已。是卽周官比閭族黨之遺法。使民相保相愛相和親。訟獄可息。風俗可淳。賢能可興。爲州縣者如此。不亦克稱其職而無負聖天子慎重民牧。委任責成之至意乎。然而州縣之吏。無不知保

甲之爲良法而勉而行之者而行之卒鮮實效何也患在行之不  
以其實而虛應故事也。卽欲以實心行之矣。而或行之過於操切。  
則亦究鮮實效。且或徒滋煩擾。蓋此法至良而行之不得其方在。  
官在民均有其難焉者。何者。州縣雖曰親民之吏。而六官之政具。  
焉。其任至重。其職至煩。其地方之大者。或數百里。小亦數十里。其。  
民戶之繁庶。多或一二十萬。少亦數萬。爲州縣者。斷獄聽訟。日不。  
暇給。安能一一親履其地。而稽查要束之。必悉乎勢。不得不委其。  
事於鄉保。鄉保受任。不過逐戶註填名姓。其中丁口不實。秀頑良。  
棍混然莫辨。有保甲之名。而無保甲之實。所以雖欲實心行之。而。

究不過虛應故事也。而操切煩擾之弊。更有其甚焉者。蓋保甲之行。莫難於推擇甲長。保正。愚民無知畏不敢當。何者。一家有罪。十家連坐。卽周官有皋繇裘相及之意也。而民戶之中。有悍戾難馴者。其平日善良畏而避之。且不服。更嚴連坐之法。彼益得藉以挾制。而需索扳誣之不已。甲長保正孰能無所畏避。而約束之乎。卽一甲之內。有紳衿同居。而其畏悍戾難馴之民。滋甚然則將何以行之乎。鄙人迂愚。向曾奉邑長命。於所居之鄉。爲之編查。歷稽古人成法。細心籌之。承下問。敬成保甲事宜一通呈正。惟足下垂教焉。餘惟自愛。不宣。

楊北溪曰灼見其弊卽有救弊之方此歐陽子所謂策論爲古人所難者也